

**Meeqqat piitsuussusaannut, ajornartorsiutip annertussusaanut aamma ajornartorsiummut qanoq iliorluni qaangiiniarluni aaqqiissutissaq pillugu apeqquteqaat aallaavigalugu oqallinnissamik siunnersuut.**  
(Inatsisartunut ilaasortaq Asii Chemnitz Narup, Inuit Ataqatigiit)

### **Akissuteqaat**

(Meeqqanut, Inuusuttunut Ilaqutariinnullu Naalakkersuisoq)

### **Siullermeerneqarnera**

Meerartatta toqqissisimallutik peroriartorsinnaanissaasa qulakkiikkamik aaqqiiffigineqarnissaa taassumalu qanoq iliorluni pisinnaanissaa pillugu apeqquteqaat aallaavigalugu oqallittoqarnissaanik Asii Chemnitz Narup (Inuit Ataqatigiit) pingaarutilimmik siunnersuuteqarneranut qujaffigaarput. Meerartatta pitsaasumik meeraasarnissaat kissaatigigutsigu ajornartorsiutip sorlaa tikillugu sulisoqarnissaa pingaarnerpaajuvoq.

Meeqqat akornanni piitsuussuseq ajornartorsiutaavoq tamannalu ilinniartitsisutut sulisimaninni misigisarsimavara. Meeqqat kaallutik atuariartortut ajuusaarnaqisumik takusarsimavakka. Meeqqat ilaquuttatik illersorsinnaajumallugit ajornartorsiutiminnik toqqrteriniarsarisut naapittarsimavakka. Meeqqat taamatut akisussaaffimmik allatut ajornartumik isumaginnittussatut misigisimassangillat. Taamaattumik meeqqat piitsutut peroriartortartut ikilisinneqarnissaat tamassumalu qanoq iliornikkut pisinnaanissaa pinngitsoorata oqallisisariaqarparput.

Meeqqat piitsuunerat assigiinngisitaartumik nalilersorneqarsinnaavoq. Meeqqat piitsut qassiuneri nalilersussagutsigu piitsuussutsip qanoq paasineqarnissaa apeqqutaasussaavoq. Meeqqat akornanni piitsuussusermut meeqqanut tapit uuttuutitut siunnersuummi atorreqarput. Meeqqanut tapit inatsisit aqquutigalugit meeqqamut pilersuinissamut pitsaasumik tunngaveqarnissap qulakkeernissaanut iluaqutaasarput. Kalaallit Nunaanni meeqqat 28 pct.-ii ilaqutariinni isertitakitsuni meeqqanut tapiissutinik tiguisartuni peroriartorsimammata imaanngilaq meeqqat taakku ajortumik meeraaneqartut. Ilaqutariit ilaat aningaasaqarnikkut nukissaqanngillat, taamaakkaluartorli meeqqaminnik isumassuillutik pisarput, toqqissillunilu peroriartornissamik tunniussaqaartarlutik. Taamatuttaaq ilaqutariit aningaasaqarluarsinnaapput, taamaakkaluartorli meeqqaminnut toqqissisimanermik isumassuinermillu tunniussisinnaaneq ajorlutik. Nunarput tamakkerlugu imigassamik ikiaroorniutinillu atuinermut kisitsisit takugaanni ajornarsinnaasarpoq paasissallugu ilumut angajoqqaat aningaasaataat meeqqamut iluaqutinngorsinnaasarnersut. Taamaammatt meeqqani piitsuussuseq annertuutut taaneqarsinnaavoq meerartattalu akornanni piitsuussuseq qanoq siaruartigisimanersaq iluamik paaserusukkutsigu tamanna assigiinngitsorpassuartigut isiginiartariaqarparput.

Naalakkersuisut "Meeqqat pisinnaatitaaffii pillugit Naalagaaffiit Peqatigiit isumaqatigiissutaata malinneqarnissaanut iliuusissatut pilersaarut 2023-2030"-p saqqummersinneratigut piitsuussusermut killissarititap erseqqissaaffiginissaa pillugu suliniutissaq nutaaq ilisaritinneqassaaq. Taanna Kalaallit Nunaanni piitsuussuseq pillugu ilisimasaqarnerulernissap qulakkeernissaanut iluaqutaassaaq, tassungalu meeqqani

piitsuussuseq ilaassaaq. Iliuusissatut pilersaarummi pisortanit ikiorsiissutit aaqqissuusseqqiffiginerat aamma innersuussutigineqarpoq. Aaqqissuusseqqinneq angajoqqaat amerlanerit sulilernissaannut tapeeqataassaaq. Taamaaliornikkut pilersuinissamut pitsaanerusemik tunngavissartik pilersissinnaavaat, meeqqamullu maligassiuisutut inississinnaassallutik. Aaqqissuusseqqinneq aamma innuttaasut namminneq inuunermikkut atugarisaminnik pitsanngoriartitsinissaannut kajuminnerulersitsissaaq periarfissiillunilu, taamaaliornikkut inuiaqatigiinni piitsuussuseq annikillisinneqarsinnaassammat. Naalackersuisut tamatuma saniatigut inatsisissatut siunnersuummik suliaqarsimavoq, akissakinnerusunut meeqqanut tapinik annertunerusunik ilassuteqartumik, ilaatigut makkunanga suliaqarfimmuut nutaanik aningaasaliineq. Siunnersuut Upernaanerani ataatsimiinnermi 2023-mi saqqummiunneqassaaq.

Immikkoortut assigiinngitsut akornanni aatsaat suleqatigiissinnaagutta meeqqat piitsuunerat iliuuseqarfigisinnaavarput. Taamaattumik Kalaallit Nunaanni meeqqat akornanni piitsuussuseq akiorniarlugu sulinermi suliffinnut suliaqarfiup, inersimasunut atugarliortunut suliaqarfiup, aningaasaqarnermut suliaqarfiup, peqqinnissamut suliaqarfiup aamma meeqqanut, inuusuttunut ilaqutariinnullu suliaqarfiup ilanngunnissaat Naalackersuisut immikkut qitiutinniarpaa.

Tamatuma saniatigut Naalackersuisut ukiaaru iliuusissatut pilersaarutit allat arlallit saqqummersinniarpaa, tassanilu ilaqutariinni pinaveersaartitsilluni sulineq tapersersorneqassaaq iluaquserneqarlunilu. Taamatut sulinikkut isumassuinikkut piitsuussuseq annikillisinneqassaaq meeqqallu toqqissillutik peroriartornissaat tassuuna qulakkeerlugu. Ilaqutariinni pinaveersaartitsiffiusumik sulinikkut meeqqat kingornutanik ajortunik qaangiinissaat qulakkeerneqarsinnaavoq. Tamanna inuuniarnikkut periarfissaqartitsinerulissaaq taamaaliornikkullu piffissami ungasinnerusumi meeqqat akornanni piitsuussuseq annikillisinneqarsinnaassalluni.

Naalackersuisut sammisassaaq pingaarutilik pillugu oqallilluartoqarnissaanut qilanaarput.